

# ЕРЕМИЁ ПАЙҒАМБАРНИНГ МАРСИЯСИ

## Кириш

Мазкур китоб милоддан олдинги 586 йилда Қуддуснинг қулаши ва Яхудо халқининг Бобилга сургун қилиниши муносабати билан ёзилган. Китоб бешта шеърий тўпламдан, яъни беш бобдан ташкил топган. Чуқур қайғу ифодаси бўлган бу шеърлар марсия деб аталади. Мазкур шеърлар Қуддус шаҳри номидан ва “пайғамбар” деб аталган китоб муаллифи номидан баён қилинган. Бу китоб муаллифи Еремиё пайғамбардир.

Қуддус ўз гуноҳлари учун жазо тортаётганини Еремиё пайғамбар тан олади, лекин у Қуддус ва Маъбад вайрон бўлганидан, Яхудо аҳолиси асирикка олиб кетилганидан қаттиқ қайғуради. Бироқ умид учқунлари ўшандай мусибатли дамларда ҳам ўчмайди. Китоб муаллифи Худонинг эзгулигига, севгисига ва садоқатига қаттиқ ишонади. У Худога ёлвориб, халққа раҳм-шафқат қилишини сўрайди.

## 1-БОБ

### Қуддуснинг бошига келган кулфат

<sup>1</sup> Вой шўрим!

Одамларга тўлиб-тошган бир вақтлар,  
Нақадар ёлғиздир энди бу шаҳар!  
Халқлар орасида шуҳрат қозонган,  
Энди бир бева аёлга у ўхшаб қолган.  
У вилоятлар орасида маликадай эди,  
Энди у бир чўрига ўхшаб қолди.

<sup>2</sup> Кечалари у аччиқ-аччиқ йиғлайди,  
Кўзларидан ёшлар оқади.  
Уни юпатадиган бирон кимса  
Йўқдир ўйнашларининг орасида.  
Дўстлари унга хиёнат қилишди,  
Унга душман бўлиб қолишди.

<sup>3</sup> Яхудо\* халқи сургун бўлиб, азоблар тортди,  
Тутқунликнинг машаққатини у тотиб кўрди.  
Бегона халқлар орасида ўрнашганда,  
Ўзига ором топа олмади.  
У танг аҳволга тушиб қолганда,  
Таъқиб этувчилар уни қўлга олди.

<sup>4</sup> Қуддусга\* борадиган йўллар тутяпти мотам,  
Ахир, белгиланган байрамларга келмас бирор ҳам одам.  
Шаҳарнинг ҳамма дарвозалари ҳувиллаб қолди,  
Рұҳонийлари хўрсиниб ўтирибди.

Куддуслик қизлар<sup>\*</sup> қайғуга ботган,  
Куддуснинг ўзи ҳам изтиробда қолган.

<sup>5</sup> Куддусга душманлари бош бўлди,  
Унинг ғанимлари равнақ топди.  
Куддус беҳад кўп гуноҳ қилди,  
Шу сабабдан Эгамиз уни азобга солди.  
Куддуснинг фарзандлари сургун қилинди,  
Ғанимлари уларни олиб кетди.

<sup>6</sup> Қиз<sup>\*</sup> Куддус ўз савлатини йўқотди.  
Йўлбошчилари ўтлоқ топа олмаган кийикка ўхшайди.  
Овчидан қочишга уларнинг мадори қолмади.

<sup>7</sup> Кулфату саргардонлик кунларида  
Куддус олдинги хазиналарини эслади.  
Унинг ахолиси душманларга<sup>\*</sup> таслим бўлганда,  
Куддусга ёрдам берадиган ҳеч ким йўқ эди.  
Ғанимлари унинг қулашини томоша қилиб,  
Куддусни масхара қиларди.

<sup>8</sup> Ҳа, Куддус жирканч гуноҳга қўл урди,  
Атрофдагиларга у қулги бўлди.  
Олдин уни эъзозлаганларнинг ҳаммаси  
Энди ундан ҳазар қиласи.  
Куддуснинг шармандалигини улар қўрдилар.  
Мана энди Куддус хўрсиниб ўтирибди,  
Ҳаммадан юзини яшириб ўтирибди.

<sup>9</sup> Унинг нопоклиги кийимини доғ қилди,  
Келажаги ҳақида у қайғурмади.  
У даҳшатли тарзда қулади,  
Унинг юпатувчиси йўқ эди.  
У шундай деб ёлворди:  
“Кулфатимга бир назар солгин, эй Эгам,  
Зоро, душманларим ғолиб келди устимдан!”

<sup>10</sup> Ғанимлар Куддус хазиналарига чанг солди.  
Куддуснинг кўзи олдида  
Бегона халқлар муқаддас маконга кирди.  
Аммо Эгамиз ўша ғайрияҳудийларга  
Ҳатто Исройл жамоаси йифинида бўлишни ман этганди!\*

<sup>11</sup> Мана энди шаҳардаги ҳамма одамлар хўрсиниб,  
Бир бурда нонни излаб юрибди.  
Улар бойликларини сотиб, овқат олишяпти,  
Шу йўсин ўз жонларини сақлашяпти.  
Куддус шундай деб ёлвормоқда:  
“Эй Эгам, менга бир боққин,  
Хор бўлганимни кўриб қўйгин!”

<sup>12</sup> Куддус ўтган–кетганларга хитоб қиласы:  
“Наҳотки сизларга барибир бўлса?!\*  
Менга бир қаранглар! — деб ёлворади. —  
Эгамиз ғазаб кунида менга азоб берган,  
Бундай азобни ҳеч ким кўрмаган.

<sup>13</sup> У осмондан олов юборди,  
Ўша олов ичимни ёндириди.  
Эгамиз оёғимга тузоқ қўйди,  
Мени ортга қайтишга мажбур қиласы.  
Адои тамом қиласы мени Худойим,  
Азобу аламда қолди менинг жоним.

<sup>14</sup> Гуноҳларим бўйинтуруқقا айланган,  
Ўша бўйинтуруқни Эгамизнинг йиғасан.  
У гуноҳларимни\* бўйнимга осди.  
Мени тамом ҳолдан тойдирди.  
Раббий берди мени душманларим қўлига,  
Мен қаршилик қила олмайман уларга.

<sup>15</sup> Раббий кучли жангчиларимни рад этди,  
Йигитларимни яксон қилиш учун лашкар юборди.  
Бокира қиз Яхудони\* Раббий узум эзгандай эзди\*.

<sup>16</sup> Шунинг учун мен фарёд қиласман,  
Кўз ёшимни сел–сел оқизаман.  
Ахир, юпатувчим мендан узоқда,  
Жонимга оро киравчи олисада.  
Эвоҳ, душманларим мендан ғолиб келди,  
Фарзандларим хонавайрон бўлди.”

<sup>17</sup> Куддус қўлларини чўзиб ёрдам сўрайди,  
Бироқ ҳеч ким уни юпатмайди.  
Эгамиз қўшни халқларга амр берди,  
Шунда ҳаммаси Ёқуб наслига душман бўлиб қолди.  
Душманларининг назарида  
Куддус ахлатдай жирканч бўлиб қолди.

<sup>18</sup> Куддус айтмоқда:  
“Ҳа, менинг Эгам ҳақ,  
Ахир, ўзим Унинг амрига қарши бош кўтардим.  
Эй халқлар, менга қулоқ солинг,  
Менинг кулфатимни кўриб қўйинг.  
Менинг йигит–қизларим сургун бўлди.

<sup>19</sup> Мен ўйнашларимни чақирдим,  
Улар эса мени алдашди.  
Жонини сақлаш учун нон излаган  
Руҳонию оқсоқолларим кўчаларда жон берди.

<sup>20</sup> Эй Эгам, кўриб қўйгин қайғумни,

Кўргин тўкилиб турган юрагимни.  
 Эвоҳ, юрак-бағрим эзилиб кетди,  
 Ахир, мен Сенга қарши бош кўтардим.  
 Ана, ташқарида қилич одамларни чопяпти,  
 Ичкарида ўлим хукмронлик қиляпти.

<sup>21</sup> Одамлар оху нолаларимни эшитди,  
 Бироқ менинг юпатувчим йўқ эди.  
 Ганимларим эшитди кулфатларим ҳақида,  
 Хурсанд бўлишди қилган ишингдан шунда.  
 Сен эълон қилган ўша кунинг келсин,  
 Душманларим ҳам менинг ҳолимга тушсин.

<sup>22</sup> Назарингдан қочмасин уларнинг қилган қабиҳликлари,  
 Гуноҳим учун мени жазолагандай жазолагин уларни.  
 Кўпdir менинг оху нолаларим,  
 Ҳеч ҳам қолмади менинг мадорим.”

## 2-БОБ

### Эгамиз Қуддусни жазолайди

<sup>1</sup> Вой шўрим!  
 Раббий ғазабланиб,  
 Қиз<sup>\*</sup> Қуддусни<sup>\*</sup> зулмат билан қоплади,  
 У Исроилнинг салобатини  
 Осмондан ерга улоқтириди.  
 Қаттиқ қаҳри келганда,  
 Ўз пойандози бўлган Маъбадини эсга олмади.

<sup>2</sup> Раббий аёвсиз вайрон қилди  
 Ёкуб наслининг масканларини.  
 Ғазаби келиб яксон қилди  
 Қиз Яхудонинг<sup>\*</sup> қалъаларини.  
 Оёқ ости қилиб, хўрлади  
 Шоҳликни ва унинг ҳукмдорларини.

<sup>3</sup> У қаттиқ ғазабга миниб,  
 Исроилнинг бор қудратини йўқ қилди\*.  
 Ганимлар ҳужум қилганда,  
 Ўз халқини ҳимоя қилмади.  
 Авжига чиққан олов ёндиригандай,  
 Ёкубнинг юртини ёндириб юборди.

<sup>4</sup> У ғанимдай бизга қаратса ёйини тортди,  
 Ўқузишга Унинг қўли тайёр туарди.  
 У келишган йигитларимизни душмандай ўлдирди.  
 Қиз Қуддуснинг чодирларига оловдай қаҳрини сочди.

<sup>5</sup> Раббий душманга ўхшаб қолди,  
 Исроил юртини вайрон қилди.  
 Хароб қилди барча саройларини,

Яксон этди Исройл қалъаларини.  
Қиз Яхудога келтирди ғам-ғусса,  
Унинг қайғусини орттириди минг ҳисса.

<sup>6</sup> Боғдаги чайлани йиқитгандай,  
Маъбадини У бузиб ташлади\*.  
Қуддусдаги байрам ва Шаббат кунларини  
Эгамиз бекор қилди.  
Шоҳлар ва руҳонийларни  
Ғазаб устида рад этди.

<sup>7</sup> Раббий Ўз қурбонгоҳидан воз кечди,  
Ўз масканини ташлаб кетди.  
Қуддус саройларини ёвнинг қўлига берди.  
Эгамиз уйидаги ёвнинг ҳайқириғи  
Байрамдаги шодон овозларга ўхшайди.

<sup>8</sup> Ҳа, Эгамиз қиз Қуддуснинг деворларини  
Вайрон этишга қарор қилди.  
Деворларга бирма-бир қараб чиқди,  
Шаштидан қайтмади, ҳаммасини яксон қилди.  
Энди қалъаю деворлар қайғуряпти,  
Ҳаммаси хароб бўлиб ётибди.

<sup>9</sup> Қуддус дарвозалари тупроққа беланиб ётибди,  
Дарвоза тамбалари парчаланиб ётибди.  
Шоҳу амалдорлари сургун бўлишди,  
Қонунлар халққа ўргатилмас энди.  
Эгамиздан ваҳийлар  
Пайғамбарларга келмас энди.

<sup>10</sup> Қиз Қуддуснинг оқсоқоллари  
Сукут сақлаб ерда ўтирибди.  
Бошларидан улар тупроқ сочган,  
Ўзлари қанорга ўранган\*.  
Бошларини солиб қуий  
Ўтирибди Қуддус қизлари.

<sup>11</sup> Йиғлайвериб қўзларим толган,  
Ичимда юрагим тўкилиб кетган.  
Жигар-бағрим эзилиб кетди,  
Ахир, менинг халқим қирилиб кетди!  
Оч қолган гўдагу чақалоқлар  
Шаҳар кўчаларида ҳушсиз ётибди!

<sup>12</sup> “Қорним очди! Чанқадим!” деб  
Оналарига улар фарёд қилар.  
Ярадор жангчидай шаҳар кўчаларида ҳушсиз ётишар.  
Оналарининг бағрида жон таслим этишар.

<sup>13</sup> Сен ҳақингда нима айтай?!

Сени кимга солишириай, эй қиз Қуддус?  
 Нима деб юпатай?!

Сени кимларга үхшатай, эй бокира қиз Сион?  
 Денгиздай чексиздир сенинг қулфатинг,  
 Энди шифо бера олмас сенга ҳеч ким!

<sup>14</sup> Сенинг пайғамбарларинг  
 Ёлғон ва бехуда вахийлар айтишди.  
 Гуноҳларингни фош қилишмади,  
 Сургуннинг олдини олишмади.  
 Ёлғон башоратлар айтиб,  
 Сени йўлдан оздириши.

<sup>15</sup> Ўтган–кетганлар сендан ор қилиб,  
 Кўл силтаб кетадилар.  
 Ёқасини ушлаб, бошларини чайқайдилар,  
 Эй қиз Қуддус, сени мазах қилиб шундай дейдилар:  
 “Гўзалликда комил шаҳарми шу?!”  
 Бутун дунёнинг севинчимиш у!”

<sup>16</sup> Барча ёвларинг устингдан қулади,  
 Ҳолингни кўриб ёқасини ушлайди.  
 Тишларини ғижирлатиб айтишади:  
 “Биз уни ямладик!  
 Воҳ, қандай интизорлик билан  
 Бу кунни кутган эдик!  
 Ниҳоят, ўша қунга етдик!”

<sup>17</sup> Эвоҳ, Эгамиз Ўз режаларини амалга оширди,  
 Ўз айтганларини битта қолдирмай бажарди.  
 У азалдан огоҳлантириб келгандай  
 Сизларни аёвсиз қириб ташлади.  
 Фанимларнинг қудратини\* юксалтириди,  
 Аҳволингиздан душманларни хурсанд қилди.

<sup>18</sup> Шаҳар аҳлининг қалби Раббийга фарёд қилмоқда,  
 Эй қиз Қуддуснинг деворлари!  
 Кўз ёшингиз кечаю кундуз дарё бўлиб оқсин.  
 Нолаю фарёдингиз асло тинмасин,  
 Кўз ёшингиз тўхтамасин!

<sup>19</sup> Тур, эй қиз Қуддус!  
 Кечаси билан Худога илтижо қилиб чиққин!  
 Юрагингни Раббийга сувдай тўкиб солгин!  
 Кўлларингни узат осмонга,  
 Фарзандларинг учун ёлворгин Унга!  
 Ахир, улар очликдан ҳушсиз ётибди  
 Ҳар бир кўччанинг бошида.

<sup>20</sup> Шундай ибодат қилгин:  
 “Эй Эгам, кўрмайсанми буни:

Не күйларга солиб қўйдинг Сен халқингни?!  
Оналар эркалатиб ўстирган фарзандларини ейишпти-ку!  
Руҳонию пайғамбарлар масканингда қирилиб кетяпти-ку!

<sup>21</sup> Ёшу қариларнинг жасадлари кўчада чангга беланиб ётибди.  
Қилич дастидан йигиту қизларим жувонмарг бўлди.  
Сен ғазабинг келган куни уларни ҳалок қилдинг,  
Аёвсиз уларни қириб ташладинг.

<sup>22</sup> Менга қарши йиғдинг Сен теваракдаги ёвларни,  
Гўё зиёфатга чақиргандай таклиф қилдинг уларни.  
Ўша куни Сенинг ғазабингдан ҳеч ким қутулолмади,  
Бирор одам ўз жонини сақлаб қололмади.  
Эвоҳ, эркалаб ўстирган болаларимни\*  
Душманларим ўлдирди.”

### 3-БОБ

#### УМИД УЧҚУНЛАРИ

<sup>1</sup> Азобларда қолган инсонман,  
Худонинг ғазаби туфайли таёқ едим.

<sup>2</sup> Бошлаб борди Эгам мени зулматга,  
Нур тушмайдиган қоронғи жойга.

<sup>3</sup> Ёлғиз менга қарши У қўл кўтарди,  
Кун бўйи мени қайта-қайта жазолади.

<sup>4</sup> Қаритиб юборди эту теримни,  
Синдириб ташлади суюкларимни.

<sup>5</sup> Ғам-аламга мени тутқун қилди,  
Жабру жафо зиндонига мени ташлади.

<sup>6</sup> Мажбур қилди мени зимистонда яшашга,  
Ўхшаб қолдим мен анча олдин ўлган одамга!

<sup>7</sup> Қочиб кетмасин дея, Худо атрофимни қуршади,  
Оғир занжирлар билан мени кишанбанд этди.

<sup>8</sup> Ёрдам сўраб ёлворсам ҳам мен Унга,  
Кулоқ солмас У менинг фифонимга.

<sup>9</sup> Йўнилган тошлар билан У йўлимни тўсади,  
Юрган йўлимни чалкаштириб юборди.

<sup>10</sup> Пойлади У мени айиқдай,  
Ташланмоқчи бўлди менга шердай.

<sup>11</sup> Сўнг мени судради бир четга,  
Ғажиди, солиб кетди танг аҳволга.

<sup>12</sup> Худо ўз ёйини тортди,  
Ўқларига мени нишон қилди.

<sup>13</sup> Садоғидаги ўқлари билан юрагимни тешди.

<sup>14</sup> Мана энди ўз халқим устимдан кулмоқда,  
Уззукун улар мени мазах қилиб, қўшиқ куйламоқда.

<sup>15</sup> Худо менга аччик ўтдан едирди,

Захарли сувдан менга ичирди.

<sup>16</sup> Мени оёқ ости қилиб, тупроққа белади,  
Шағал едириб, тишларимни синдириди.

<sup>17</sup> Тинчлик билмас энди менинг жоним,  
Бахт нималигини тамом унутдим,

<sup>18</sup> Шунда ўзимга дедим: “Адои тамом бўлдим!  
Барбод бўлди Эгамга бўлган умидим!”

<sup>19</sup> Кулфату саргардонлик ҳақидаги ўйларим  
Захарли сувга, аччиқ ўтга ўхшайди.

<sup>20</sup> Бундай ўйларга толган менинг жоним  
Тушкунликка тушди.

<sup>21</sup> Бироқ мен бир нарсани ёдда тутарман,  
Шунинг учун доим умид қиласман:

<sup>22</sup> Эгамнинг содиқ севгиси бўлмайди адо\*,  
Унинг раҳму шафқати тугамас асло.

<sup>23</sup> Ҳар тонг улар янгиланади,  
Буюқдир Эгамнинг садоқати!

<sup>24</sup> Қалбимда айтаман: “Эгамдир менинг бор–йўғим,  
Шундай экан, ёлғиз Ундардир менинг умидим.”

<sup>25</sup> Эгамиз Ўзига умид боғлаганларга яхшилик қиласди,  
Унга интилган ҳар бир жонга эзгулигини кўрсатади.

<sup>26</sup> Эгамизнинг нажотини тоқат ила қутиш яхшидир.

<sup>27</sup> Ёшлиқдан тарбияга бўйсуниш яхшидир.

<sup>28</sup> Раббий тарбиялаганда,  
Ёлғиз ўтириб, сукут сақлайлик.

<sup>29</sup> Бундай вақтларда ер ўпиб таъзим қилайлик,  
Ахир, яна умид бордир.

<sup>30</sup> Тарсаки еганимизда қаршилик қилмайлик,  
Эшитган кўп ҳақоратларни ичимизга ютайлик.

<sup>31</sup> Зеро, Раббий бизни абадий ташлаб қўймайди!

<sup>32</sup> Унинг Ўзи бизга қайғу келтирган бўлса-да,  
Ўзи бизга раҳм-шафқат қиласди.

Ахир, Унинг содиқ севгиси буюқдир!

<sup>33</sup> Ҳа, У инсонга ғам келтириб, озор беришни хуш кўрмайди.

<sup>34</sup> Юртдаги ҳамма асиirlарнинг оёқ ости бўлганини,

<sup>35</sup> Одамлар ҳақ–хуқуқдан маҳрум бўлганини

Худойи Таоло кўриб турибди.

<sup>36</sup> Бир ёқлама хукм чиқарилганини  
Раббий билиб турибди.

<sup>37</sup> Раббийнинг ижозатисиз,

Ҳеч кимнинг буйруғи бажо бўлмас.

<sup>38</sup> Яхшилик ҳам, ёмонлик ҳам

Худойи Таолонинг амрисиз содир бўлмас.

<sup>39</sup> Ҳануз ҳаёт эканмиз,  
Гуноҳимиз учун жазо тортганда нолимайлик!

<sup>40</sup> Тутган йўлларимизни яхшилаб текширайлик,  
Эгамизга қайтайлик.

<sup>41</sup> Қўлларимизни осмонга чўзиб,  
Чин дилдан самодаги Худога ёлвориб айтайлик:  
<sup>42</sup> “Эй Эгамиз! Биз итоатсизлик қилдик,  
Сенга қарши бош кўтардик,  
Сен бизни кечирмадинг.

<sup>43</sup> Сен ғазабга миниб, таъқиб қилдинг бизни,  
Шафқатсиз қирдинг ҳаммамизни.

<sup>44</sup> Илтижоларимиз Сенга етиб бормаслиги учун  
Булутлар билан олдингни тўсдинг.

<sup>45</sup> Сен бизни ахлатдай ташлаб юбординг,  
Халқлар орасида супуриндида қилдинг.

<sup>46</sup> Мана, барча ёвларимиз устимиздан қуляпти.

<sup>47</sup> Биз ваҳимага тушдик, тузоққа илиндик,  
Фалокату ҳалокатга гирифтор бўлдик.”

<sup>48</sup> Сел-сел бўлиб оқар менинг кўз ёшларим,  
Ахир, қирилиб кетди менинг халқим!

<sup>49-50</sup> Эгамиз самодан бизга қарамагунча,  
Мен тўхтамай оби дийда қиласман,  
Тинмай кўз ёш тўкаман.

<sup>51</sup> Куддусдаги ҳамма қизларнинг қисмати  
Юрак-бағримни эзib юборди!

<sup>52</sup> Сабабсиз душманлик қилаётир менга одамлар,  
Қушни овлагандай мени овлади улар.

<sup>53</sup> Мени тириклайн чуқурликка ташлашибди,  
Чуқурлик оғзини тош билан беркитишибди.

<sup>54</sup> Сувлар кўтарилиб ошди бошимдан,  
“Адо бўлдим” дедим ичимда.

<sup>55</sup> Эй Эгам, чуқурлик тубидан  
Сенга илтижо қилдим.

<sup>56</sup> “Додимни тингла, беркитма қулоғингни!” дедим.  
Сен эшиздинг бу илтижоимни.

<sup>57</sup> Ёлворганимда Сен менга яқинлашдинг,  
“Кўрқма!” деб ўшанда менга айтдинг.

<sup>58</sup> Ё Раббий, Сен даъвоимни ҳимоя қилдинг,  
Менинг жонимни халос этдинг.

<sup>59</sup> Қўрдинг менга қилинган ноҳақликни,  
Эй Эгам, йўзинг ёқлагин мени.

<sup>60</sup> Ёвларимнинг тил бириктирганини Сен кўрдинг,  
Менга қарши қилган ёвуз ниятларини билдинг.

<sup>61</sup> Эй Эгам, улар мени мазах қилганини Ўзинг эшитдинг,  
Менга қарши тил бириктирганини билдинг.

<sup>62</sup> Ғанимларим мени ғийбат қиласар,  
Кун бўйи менга пичинг отар!

<sup>63</sup> Қара, улар ўтирса ҳам, турса ҳам,  
Мени мазах қилиб, қўшиқ куйлашар.

<sup>64</sup> Уларнинг қилмишларига яраша,  
Жазосини бергин, эй Эгам!

<sup>65</sup> Юракларига ғулғула солгин,  
Уларни лаънатга дучор қилгин,

<sup>66</sup> Газаб билан уларнинг кетидан қувла,  
Ер юзидан тамомила йўқ қилиб ташла!

## 4-БОБ

### Қуддуснинг қамалдаги қисмати

<sup>1</sup> Вой шўрим!

Олтин хира тортди,  
Соф тилла жилосини йўқотди.  
Ҳар бир кўча бошида  
Маъбад тошлари сочилиб ётиди.

<sup>2</sup> Куддуснинг\* азиз фарзандлари  
Олтиндан ҳам қадрли эди,  
Эвоҳ, энди эса улар  
Кулол ясаган сопол идишдай  
Қадрсиз бўлиб қолдилар.

<sup>3</sup> Ҳатто чиябўрилар  
Ўз болаларини эмизишар.  
Менинг халқим эса туяқушга ўхшаб қолди\*,  
Улар ўз фарзандларига шафқат қилмайди.

<sup>4</sup> Чақалоқлар жуда чанқаган  
Тиллари танглайига ёпишиб қолган,  
Нон сўраб, ёш болалар тиланчилик қиляпти,  
Бироқ ҳеч ким уларга бир бурда ҳам нон бермайди.

<sup>5</sup> Тансиқ таомлар еган одамлар  
Энди кўчаларда очлиқдан ўляптилар.  
Қимматбаҳо либос кийиб ўсганлар  
Энди кул уюмлари орасида ётидилар.

<sup>6</sup> Садўм шаҳрига\* қарши инсон қўли кўтарилемади,  
Аммо бу шаҳар бир зумда вайрон бўлди.  
Халқимнинг тортган жазоси  
Садўмнинг жазосидан ҳам оғирроқ бўлди.

<sup>7</sup> Сутдан ҳам оқ, қордан ҳам оппоқ эди  
Йўлбошчиларимизнинг кўнгиллари,

Маржондай товланарди соғлом таналари,  
Ёқутдай күркам эди күринишлари.

<sup>8</sup> Энди таниб бўлмас уларни кўчаларда,  
Уларнинг юзлари куядан ҳам қорароқ тусда.  
Бужмайган терилари суюкларга ёпишган,  
Тарашадан ҳам баттар қуриб-қақшаб кетган.

<sup>9</sup> Қилич тиғидан нобуд бўлганлар  
Бахтлироқдир очлик қурбонларидан.  
Зеро, қаҳатчиликка\* дучор бўлганлар  
Жонларини аста-секин таслим қиларлар.

<sup>10</sup> Мехрибон оналар туққан болаларини  
Ўз қўллари билан пиширдилар.  
Халқим ҳалокатга учраганда,  
Болалари уларга емиш бўлди.

<sup>11</sup> Эгамизнинг қаҳр-ғазаби қайнади,  
У аччиқ қаҳрини сочди,  
Қуддус шаҳрида олов ёндириди,  
Олов шаҳарни пойдеворигача куйдирди.

<sup>12</sup> Душман Қуддус дарвозаларини ёриб ўтишига  
Ер юзидағи хукмдорлар ишонмаганлар.  
Жаҳондаги одамлар буни ҳатто хаёлига ҳам келтирмаганлар.

<sup>13</sup> Шаҳардаги пайғамбарларнинг гуноҳи,  
Рұхонийларнинг жиноятлари бунга сабаб бўлди.  
Ахир, улар шаҳарда солиҳ одамнинг қонини тўқдилар.

<sup>14</sup> Ҳа, улар ўз кийимини қонга булғадилар,  
Уларнинг кийимидан одамлар ҳазар қиласадилар.  
Кўр одамдай бу йўлбошчилар  
Кўчаларда дайдиб юрибдилар.

<sup>15</sup> “Йўқол, ҳаром!” деб бақиради ҳамма уларга,  
“Йўқолларинг! Йўқол! Тега кўрманг сизлар бизларга!”  
Қочиб, ғарибу мусоғир бўлиб юрганда улар,  
“Бу ердан чиқиб кетинглар”, деб халқлар уларни ҳайдар.

<sup>16</sup> Эгамизнинг Ўзи тарқатиб юборди уларни,  
Бу йўлбошчиларга энди У назар солмайди.  
Рұхонийларга ҳеч ким ҳурмат кўрсатмайди,  
Оқсоқолларга ҳеч ким марҳамат қилмайди.

<sup>17</sup> Беҳуда кутавериб мадад,  
Толди бизнинг кўзимиз,  
Мадад бера олмайдиган бир халқа\*  
Умид боғлаган эканмиз.

<sup>18</sup> Ҳар бир қадамимизни пойлади ёвимиз,

Үз күчаларимизда юролмадик биз.  
Бор-йүғи саноқли кунимиз қолди.  
Бизнинг умримиз поёнига етди.

<sup>19</sup> Бизни таъқиб қилувчилар  
Бургутдан ҳам тезроқ учшарди,  
Улар тоғларда бизни овлашарди,  
Чўлларда бизни пойлашарди.

<sup>20</sup> Эгамиз танлаган шоҳ<sup>\*</sup> уларнинг тузоғига илинди,  
Эвоҳ, ҳаётимиз манбай у эди.  
Биз шоҳимиз соясида  
Халқлар орасида яшаймиз, деб ўйлагандик.

<sup>21</sup> Эй Уз юртида<sup>\*</sup> яшовчи қиз<sup>\*</sup> Эдом<sup>\*</sup>,  
Хурсанд бўл, шодлан!  
Бироқ сен ҳам жазо косасидан<sup>\*</sup> ичасан,  
Маст бўлиб кийимингни ечасан.

<sup>22</sup> Эй қиз Куддус, жиноятларинг учун  
Сен жазоингни тортиб бўлдинг.  
Энди Эгамиз сени сургунда ушлаб турмайди.  
Эй қиз Эдом, сенинг гуноҳларингни эса  
Эгамиз фош қиласи,  
Жиноятларинг учун У сени жазолайди.

## 5-БОБ

### Рахм-шафқат илтижоси

<sup>1</sup> Эй Эгам, бошимизга тушган кўргиликни ёдингда тутгин,  
Қанчалар хор бўлганимизни бир кўриб қўйгин!

<sup>2</sup> Мулк қилиб олган еrimиз ажнабийлар қўлига тушди,  
Келгиндилар уйларимизга эга бўлишди.

<sup>3</sup> Отасиз етимдай бўлиб қолдик биз,  
Бевага ўхшаб қолди оналаримиз.

<sup>4</sup> Биз ичган сувимизга пул тўлаймиз,  
Ёққани ўтинни сотиб оламиз.

<sup>5</sup> Ёвларимиз таъқиб қилиб, қўймас бизни ҳолимизга,  
Чарчаб кетдик, тиним йўқ бизга.

<sup>6</sup> Тўйгунча нон еймиз деб,  
Миср ва Оссурия билан биз сулҳ туздик.

<sup>7</sup> Аждодларимиз гуноҳ қилиб, ўтиб кетди,  
Аммо уларнинг жазосини биз тортяпмиз энди.

<sup>8</sup> Бизга ҳукмронлик қилаётир қуллар,  
Улар зулмидан бизни ким қутқарар?!

<sup>9</sup> Нон излаймиз жонимизни қўйиб хавф остига,  
Чунки каллакесарлар писиб ётибди далаларда.

<sup>10</sup> Очарчилик дастидан чиққан иссиғимиз,  
Тандирдай қизиган бизнинг баданимиз.

<sup>11</sup> Ганимларимиз Қуддусда\* аёлларни зўрлашди,  
Яхудо шаҳарларида қизларнинг номусига тегишиди.

<sup>12</sup> Қўлларидан осишиди йўлбошчиларимизни,  
Хор қилишиди оқсоқолларимизни.

<sup>13</sup> Йигитлар тегирмон тошини тортяпти,  
Ўғлонлар оғир ўтин остида гандираклаб қолди.

<sup>14</sup> Шаҳар дарвозасида\* оқсоқоллар ўтиридиган бўлди,  
Йигитлар шодон куйлар чалмайдиган бўлди.

<sup>15</sup> Қўнглимишни шодлик тарк этди,  
Ўйин–кулгимиз азага айланди.

<sup>16</sup> Бошимиздаги тожимиз тушиб кетди,  
Гуноҳ қилдик! Шўrimиз қуриди!

<sup>17</sup> Дарду аламга тўлди юрагимиз,  
Йиглайвериб хиравашди қўзимиз.

<sup>18</sup> Ахир, Сион тоғи\* хувиллаб қолди,  
Чиябўрилар у ерда изғиб юриди.

<sup>19</sup> Сен эса, эй Эгам, абадий ҳукмронлик қиласан,  
Авлодлар оша Ўз тахтингда ўтирасан.

<sup>20</sup> Нечун бизни Сен тамом унутдинг?  
Нечун узоқ вақтга ташлаб қўйдинг?

<sup>21</sup> Эй Эгам, бизни Ўзингга қаратгин,  
Токи Сенга қайтайлик.  
Қадимги улуғворлигимизни тиклагин.

<sup>22</sup> Наҳотки Сен биздан бутунлай воз кечдинг?!

Қаҳру ғазабингнинг ҳад–поёни бордир, ахир?!

## ИЗОҲЛАР

**1:1** Бу китобнинг 1-4-боблари ибронийчада мувашшаҳ усулида ёзилган шеърdir. Иброний алифбесида 22 та ҳарф бўлгани учун, мазкур китобнинг 1, 2 ва 4-боблари 22 та оятдан иборат бўлиб, ҳар бир оятдаги биринчи сўз иброний алифбесининг ҳарфлари тартиби бўйича бошланади. Китобнинг 3-бобида 66 та оят бор, ҳар 3 та оят бир бандни ташкил қилиб, боб жами 22 банддан иборат. Ҳар бир банд иброний алифбесининг ҳарфлари тартиби бўйича бошланади. Биринчи банддаги оятлар иброний алифбесининг биринчи ҳарфи билан бошланади, иккинчи банддаги оятлар иброний алифбесининг иккинчи ҳарфи билан бошланади ва ҳоказо. Китобнинг 5-боби мувашшаҳ усулида ёзилмаган бўлса-да, боб 22 оятдан иборат.

**1:3 Яхудо —** Яхудо қабиласи Исроилнинг жанубий қисмидаги энг катта қабила эди. Шоҳ Сулаймон вафотидан кейин шимолдаги ўнта қабила жанубдаги Яхудо ва Бенямин қабилаларидан ажралиб чиқди (3 Шоҳлар 11:26-12:24 га қаранг). Яхудо ва Бенямин қабилалари жанубий шоҳлик деб аталадиган бўлди. Жанубий шоҳликнинг пойтахти Қуддус бўлиб қолаверди, уларнинг ўз ҳукмдорлари бор эди. Эски Аҳднинг баъзи парчаларида Яхудо сўзи жанубдаги иккала қабилага нисбатан ишлатилган. Тўлиқроқ маълумотга эга бўлиш учун луғатдаги ЯХУДО сўзига қаранг.

**1:4 Қуддус —** ибронийча матнда Сион (шу бобнинг 6, 17-оатларида ҳам бор). Эски Аҳддаги шеърий парчаларда ва пайғамбарлар битикларида Сион сўзи кўпинча Қуддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун луғатдаги СИОН сўзига қаранг.

**1:4 Қуддуслик қизлар —** Маъбаддаги байрам сайилларида иштирок этадиган қизлар назарда тутилган бўлиши мумкин (Забур 67:25-27 га қаранг).

**1:6 Қиз —** шаҳар ёки юрт аҳлига нисбатан қўлланган шеърий усул.

**1:7 душманлар —** Бобил босқинчилари назарда тутилган.

**1:10 ...Эгамиз...ман этганди —** Қонунлар 23:3 га қаранг.

**1:12 Наҳотки сизларга барибир бўлса?! —** ёки Бундай қўргилик сизларнинг бошингизга тушмасин!

**1:14 гуноҳларим —** ёки ясаган бу бўйинтуруқ.

**1:15 Бокира қиз Яхудо —** Қуддус ва унинг аҳлига нисбатан қўлланган шеърий усул.

**1:15 ...Раббий узум эзгандай эзди —** қадимги пайтларда одамлар узумни қоятошга ўйилган чуқурга ёки тупроқдан қазилган, тубига ва атрофига зич қилиб тош терилган чуқурга солиб, шарбатини сиқиб олиш учун оёқлари билан эзардилар. Шарбат ўша чуқурдан яна бошқа бир чуқурга оқиб тушарди. Узум эзиш Муқаддас Китобда кўпинча Худонинг одамлар устидан чиқарадиган хукмига нисбатан кўчма маънода ишлатилган.

**2:1 Қиз —** 1:6 изоҳига қаранг.

**2:1 Қуддус —** ибронийча матнда Сион (шу бобнинг 4, 6, 8, 18-оатларида ҳам бор). 1:4 нинг биринчи изоҳига қаранг.

**2:2 Қиз Яхудо —** 1:15 нинг биринчи изоҳига қаранг.

**2:3 ...Исроилнинг бор қудратини ўйқ қилди —** ибронийча матндан сўзма-сўз

таржимаси ...Исройлнинг ҳар бир шохини кесиб ташлади. Эски Аҳдда буқанинг шохи кўпинча қўчма маънода ишлатилиб, кучли ҳукмдорга ёки ҳарбий қудратга ишора қилган.

**2:6** *Боғдаги чайланни йиқитгандаи, Маъбадини У бузиб ташлади — ёки Уузумзор деворини йиқитгандаи, Маъбад деворларини бузиб ташлади.*

**2:10** *Бошлиридан улар тупроқ сочган, Ўзлари қанорга ўранган — қанор дағал қорамтири мато бўлиб, эчки ёки түя жунидан тўқилган. Қанорга ўраниб олиш ва бошга тупроқ сочиш умидсизликни ва қайғули ҳолатни ифодалайди. Кўпинча бу ҳаракат Худодан кечирим сўраб ибодат қилиш ва Ундан мадад тилаш билан биргаликда амалга оширилган.*

**2:17** *қудрат* — ибронийча матндан сўзма-сўз таржимаси *шох*, яъни буқанинг шохи. Шу бобнинг 3-ояти изоҳига қаранг.

**2:22** *болаларим* — Қуддус аҳли назарда тутилган.

**3:22** *Эгамнинг содиқ севгиси бўлмайди адo...* — кўплаб иброний қўлёзмаларидан, қадими юононча ва сурёнийча таржималардан. Ибронийча матнда *Эгамнинг содиқ севгиси туфайли биз нобуд бўлмадик....*

**4:2** *Қуддус* — ибронийча матнда *Сион* (шу бобнинг 11, 22-оятларида ҳам бор). 1:4 нинг биринчи изоҳига қаранг.

**4:3** *...туяқушга ўхшаб қолди...* — мода туюқуш палапомларига меҳр бермайдиган ёмон она ҳисобланади (Аюб 39:14-16 га қаранг).

**4:6** *Садўм шаҳри* — аҳолисининг ўта бузуқлиги оқибатида Эгамиз вайрон қилган шаҳар (Ибитдо 18:16-19:28 га қаранг).

**4:9** *...очлик...қаҳатчилик...* — милоддан олдинги 589 йилда Бобил лашкари Қуддусни қамал қилди. Икки ярим йил давомида шаҳарга ҳеч қандай егулик кирмади (4 Шоҳлар 25:1-3 га ва ўша оятларнинг изоҳларига қаранг).

**4:17** *бир халқ* — Яхудо халқининг иттифоқдоши бўлган Миср халқи назарда тутилган.

**4:20** *Эгамиз танлаган шоҳ* — милоддан олдинги 597-586 йилларда ҳукмронлик қилган Яхудо шоҳи Зидқиё назарда тутилган (4 Шоҳлар 25:1-7 га қаранг).

**4:21** *Уз юрти* — Ўлик денгизнинг жанубида жойлашган бўлиб, ўша даврда Эдом халқининг қўли остида эди.

**4:21** *қиз* — 1:6 изоҳига қаранг.

**4:21** *Эдом* — бу юрт Ўлик денгизнинг жанубида жойлашган эди. Эдом халқи азалдан Исройл халқининг душмани бўлиб келган эди. Бобилликлар Қуддусни вайрон қилганларида, Эдом халқи Бобилликларга ёрдам берган эди (Забур 136:7, Хизқиёл 35:5 ва Ободиё 10-14-оятларга қаранг). Тўлиқроқ маълумотга эга бўлиш учун луғатдаги ЭДОМ сўзига қаранг.

**4:21** *жазо косаси* — Худо ғазабининг рамзи бўлган шароб косасига ишора. Мана шу шаробдан маст бўлиш Худонинг ҳукмига дучор бўлишни билдиради (Ишаё 51:17-23, Еремиё 25:15-29 га қаранг).

**5:11** *Қуддус* — ибронийча матнда *Сион*. 1:4 нинг биринчи изоҳига қаранг.

**5:14** *Шаҳар дарвозасида...* — қадимги пайтларда оқсоқоллар ва обрўли одамлар шаҳар дарвозаси олдида йиғилиб, ҳакамлик вазифасини бажаардилар. У ерда турли масалаларни кўриб чиқиб, ҳал қиласидилар.

**5:18** *Сион тоги* — Куддусдаги Маъбад қурилган тепалик Сион тоги деб аталган. Эски Аҳддаги шеърий парчаларда ва пайғамбарлар битикларида Сион сўзи кўпинча Куддус шаҳрига ёки Худонинг халқига нисбатан ишлатилган. Тўлиқроқ маълумотга эга бўлиш учун лугатдаги СИОН сўзига қаранг.